

PERMANESÉ

Revista pa Esposanan di Pastor Adventista - Union Karibe Hulandes - Año 2022



Spiritu Santo

NOS AMIGU

KONTENIDO:



- ★ Promesa di Spiritu Santu
- ★ Konsoladó Sigur
- ★ Persona di Spiritu Santu
- ★ Frutanan di Spiritu
- ★ I Proklamashon di e Evangelio
- ★ Boutismo di Spiritu Santu
- ★ E Piká Ku No Tin Pordon

E revista semestral aki ta prepará especialmente pa stimulá vitalidat spiritual, pa nutri kresementu emoshonal i pa animá kada esposa di pastor di Iglesia Adventista di Shete Dia di Aruba, Bonaire i Curaçao pa biba un bida balansá, saludabel i pa enkurashá nan pa ta un bon testigu kristian den e hogar i den komunitat, pa ta un bon mamá pa nan yunan i un maravioso sosten pa nan esposo den e ministerio pastoral.

NOTA: Tur artíkulo ku no tin nòmber ta skirbí dor di editor.

SEMPER E

- ★ Ta presente,
- ★ Tabata presente,
- ★ Lo ta presente den tur eternidat sin fin!



"Spiritu Santu tabata e don mas elevá di tur ku E por a pidi su Tata pa halsa su pueblo. Tabata bai duna Spiritu Santu komo un poder regenerador, i sin esaki e sakrifisio di Kristu lo tabata pornada.

Poder di maldat tabata oumentando durante siglonan, i sumishon di hende pa e sklabilitut satániko aki ta asombroso. Por resistí i por vense piká solamente dor di intervenshon poderoso di e di tres persona di Divinidad, ku tabata pa bini, no ku energia modifiká, sino den plenitut di e poder divino.

Spiritu Santu ta hasi efektivo loke e Redentor di mundu a realisá. Dor di Spiritu Santu e kurason ta keda purifiká. Dor di e Spiritu e kreyente ta partisipá di e naturalesa divino.

Kristu a duna Su Spiritu komo poder divino pa vense tur e tendensianan pa hasi malu, sea nan ta heredá òf kultivá, i pa graba Su mes karakter den su iglesia" (*El Deseado de Todas las Gentes*, p. 625).

Ku kada artíkulo por hiba nos na e krísis di entrega na nos Amigu, e Spiritu Santu.

Ku orashon:

Anna Maria Manuela Croes

Promesa di:



Spiritu Santu

¹ “Un reavivamentu di piedat berdadero entre nos ta e nesetidat di mas grandi i urgente entre tur nos nesetidatnan. Buska esaki mester ta nos promé trabou. Mester tin esfuerso sinsero pa buska e bendishon di Señor, no pasobra Dios no ke drama Su bendishon riba nos, sino pasobra nos no ta prepará pa risibíe.

Nos Tata na shelu ta mas dispuesto pa duna Su Spiritu Santu na esnan ku pidiÉ ku mayornan terenal ta pa duna bon regalú na nan yunan. Pero e ta nos trabou dor di konfeshon, humiliashon, arepentimentu, i orashon sinsero pa kumpli ku e kondishonnan dor di kual Dios a primintí di duna nos Su bendishon.

Por spera un reavivamentu solamente na kontesta di orashon. Miéntras ku e pueblo tin asina hopi nesetidat pa Dios Su Spiritu Santu, nan no por apesiá predikashon di e Palabra te ora ku poder di e Spiritu toka nan kurason; e ora ei e diskursonan duna lo no keda sin hasi efekto.

Guiá dor di e siñansanan di Dios Su Palabra, ku manifestashon di Su Spiritu, usando diskreshon saludabel, esnan ku bin na nos reunionnan lo haña un eksperensia presioso, i bolbiendo kas bèk, nan lo ta prepará pa ehersé un influensia saludabel.” (E.G. White, *True Revival, The Church's Greatest Need*, p. 9).

“Ora nos papia di Spiritu Santu, nos no ta papiando di un ‘fantasma.’ Nos ta papiando di e echo ku Dios ta toka nos bida den e akinan i awor. Nos ta papiando di e echo ku E ta yuda nos biba riba e parti dòbel di bida, e meskla di bon i malu (*Idem*, p.58)

Únabes ku nos a mira ku e doktrina di Spiritu Santu no ta tokante bobedat òf eksitashon-dimas, pero e ta un kontesta na e problemanan aktual di bida diario, nos mester puntra, Kon mi por eksperensia Dios Su presensia den mi mes bida? Kon mi por keda toká dor di Spiritu Santu?

Ora Spiritu Santu tuma kontrol di un bida E ta trese un estado di ‘repentimentu,’ un preokupashon diario silensioso pa orguyo, papiamentu di palabra malu, i kudishi di e kurason... E Spiritu ta hasi un kambio kompleto di mente i akitut— for di ‘inhustisia pa hustisia, for di inhumanidat pa humanidat, for di ídolonan na Dios.’ Spiritu Santu ta kambia kosnan, destruyendo maldat pa por produsí amor.”

...Spiritu Santu tin aber ku problemanan diario i bida di tur dia. Dios Su presensia ta penetrá den nos bida, E ta duna nos fe asina nos no ta desesperá, amor asina nos no ta biba bidanan

indiferente, sin heful, E ta duna iglesia pa asina nos no ta so pero por selebrá huntú, traha huntú, i siña huntú... E Spiritu tin aber ku presente, pero tambe ku futuro. Ora Dios Su presensia drenta nos bida, nos sabi sin ekibokashon ku nos speranza no ta slap, e no ta basá, manera sképtikonan ta bisa, riba historianan plasentero pero improbabel di pasado. Mas bien nos speranza ta basá riba e echo indiskutibel ku Dios ta huntú ku nos.

Di e forma ei nos ta sigur ku Su promesanan ta konfiabel, i ku e speranza ku el a duna nos ta un speranza válido”.

E Promé i Último Yobida ²

Joel 2:23 “Habitantenan di Sion, sea kontentu i alegrá boso, Señor, boso Dios, ta bolbe duna áwaseru, den hèrfst, den wenter, den lènte, na e tempu adekuá, manera promé ayá.”

Kua ta e preparashon pa por risibí e último yobida?

E promé yobida ta nesario: “Nos por ta sigur ku ora e Spiritu Santu keda dramá, esnan ku no a risibí i apesiá e promé yobida lo no mira òf komprondé balor di e último yobida,” *Testimonies for Ministers*, p. 405.



Manera ta duna serena i awaseru pa pone e simia germiná, i despues hecha e kosecha, asina ta duna e Spiritu Santu pa hiba dilanti for di un etapa pa otro, e proseso di kresementu spiritual ...

“A ménos ku e promé yobida a hasi su trabou, e último yobida no por perfekshoná ningun simia.” *Idem.*, p. 515.

Hopi a stòp di risibí e promé yobida. Nan no a risibí tur e benefisionan ku Dios a premirá pa nan. Nan ta spera ku e último yobida lo drecha e fayó. Ora ku e riku abundansia di grasia keda dramá, nan tin intenshon di habri nan kurason pa risibíe.

Nan ta hasiendo un fayó teribel... A ménos nos ta avansando kada dia dor di ta un ehèmpel di e birtutnan kristian aktivo, nos lo no rekonosé e manifestashonnan di Spiritu Santu den e último yobida. E por ta yenando bida di esnan rònt di nos, pero nos lo no ripará esaki òf risibíé."- *Idem*, p. 515.

"Si nos no progresá, si nos no pone nos mes den e aktitut di risibí tanto e promé i e último yobida, nos lo pèrdè nos alma, i e responsabilidad lo ta na nos mes porta." *Idem*, p. 517.

E poder di Dios ta duna bida: Den e Palabra di Dios tin energia kreativo ku a yama e mundunan na eksistensia. E palabra aki ta komuniká poder; e ta engendrará bida... E ta transformá naturalesa i ta rekrea e alma den imágen di Dios." — *Education*, p. 122.

Nos mester di boutismo di Spiritu Santu: "Loke nos tin mester ta boutismo di Spiritu Santu. Sin dje, nos no por bai den mundu manera e disipelnan tampoko por a hasi esei despues di krusifikshon di nan Señor. Hesus tabata sa di nan gran nesidat, i El a bisa nan keda warda na Jerusalem te ora ku nan risibíÉ for di ariba."— *Review and Herald*, febrüari 18, 1890.

Nos mester resa mes fervientemente pa yobida di Spiritu Santu manera e disipelnan a resa riba e Dia di Pentekòste. Si nan tabatin mester di dje na e okashon ei, nos tin mester muchu mas di dje awe." (5T 158)

Laga nos ta konstantemente kla: "Mi no tin niun tempu espesifiko pa papia di dje tokante ki dia yobida di Spiritu Santu lo tuma lugá, ora ku e angel poderoso lo baha for di shelu i uni ku e di tres angel den kompletá e trabou pa e mundu aki. Mi mensahe ta ku nos úniko seguridat ta sinta den ser kla pa e refreshamentu selestial, pa tin nos lampinan prepará i sendí" —Ellen G. White, *Seventh Day Adventist Bible Commentary*, vol. 7, p. 995.

Orashon: Señor Hesus, yuda nos komprondé ku kada un di nos mester risibí awor aki e entrenamentu, unguimentu, i poder di Spiritu Santu.

¹ Into the Arena, p. 59, 60, 66, 67.

² Communion With God, p. 22, 23.





Konsoladó
Sigur

"Hesus a bisa ku E lo pidi su Tata pa manda e Konsoladó, Spiritu Santu, pa ta ku su disipelnan despues di su asenshon (mira Huan 14:16; 16:7). I Hesus a primintí tambe ku Spiritu Santu lo guia nan den tur bèrdat (mira Huan 16:13). Asina Spiritu Santu ta un miembro di e Trinidad, igual na e Tata i na e Yu."

Personalidat ta basá riba tres elemento básiko i Spiritu Santu tin tur tres:

1) *Un mente, e abilidad di pensa, pa atkerí konosementu i pa rasoná.*

1 Korintionan 2:10, 11 "Ma nos sí Dios a laga konosé su plan sekreto pa medio di su Spiritu. Spiritu Santu ta skrudiñá tur kos, asta e pensamentunan di Dios ku ta profundamente skondí. Den kaso di hende ta solamente hende su mes spiritu sa tur kos di dje; meskos tambe, ta solamente Spiritu di Dios sa tur kos di Dios." Nehemiah 9:20, 21 papiando di Dios ta bisa: "Bo a manda bo spiritu pa duna nan kompromedementu; Bo no a kita mana for di nan boka i Bo a duna nan awa pa kalma nan set. Durante kuarenta aña Bo a perkurá pa nan pan di kada dia den desierto i nunca nan no tabatin falta di nada; nan paña no a gasta ni nan pia no a hincha." Asina e Spiritu ta bon i El a instruí e pueblo di Dios. E ta manera un persona, no ta bèrdat?

2) *Sintimentunan i emoshonnan.*

Efesionan 4:30 "Anto no hasi Spiritu Santu di Dios ferdrit; Dios a seya boso kunÉ komo su propiedat pa marka boso pa e dia di salbasyon final." No ta posibel hasi un influensia òf un poder ferdrit, pero ta posibel sí pa heridá un persona. Spiritu Santu por sinti tristu pasobra E ta un persona, pero nunca E ta bandoná nos. E Spiritu ta sigui nos tras aña tras di aña si tin oportunidat pa nos respondé na Su yamada. El a keda pa hopi siglo ku e pueblo di Israel, soportando nan rebelionnan i nan kurason kabesura. Ta masha duru pa bira bai laga Spiritu Santu. No ta fásil logra esaki. Pakiko ta asina duru pa bandoná Spiritu Santu? Pa motibu di Su amor. Amor nunca sa ki ora ta di mas. Amor no ta entregá fásilmente. Spiritu Santu ta stima kada un di nos ku e amor inkomparabel di Dios.

3) *Spiritu Santu tin un boluntad òf e poder di skohe.*

1 Korintionan 12:11 "Ma tur esaki ta obra di ún i mésun Spiritu Santu ku ta duna kada hende su donnan manera E ta haña ta bon." Romanonan 8:26 "Di mésun manera Spiritu Santu ta bin yuda nos den nos debilidad, pasobra nos no sa kiko ta e kosnan ku nos mester resa p'e, manera debe ser. Pero Spiritu Santu mes ta interседé pa nos ku suspiro, ku palabra no por ekspresá." Spiritu Santu ta resa pa nos i ta yuda nos den nos debilidadnan. I si un persona ta resa pa bo i ta interседé pa bo, ta pasobra e ta di bo banda; e ora ei, E ta bo amigu. Huan 14:16, 17. Spiritu Santu, e Konsoladó, E ta bin biba serka nos, ku nos i den nos. Ki un konsuelo e ta pa sabi ku un di e Personanan poderoso di e Trinidad a bin biba serka nos (mira *El Deseado de Todas las Gentes*, p. 671. E ta presente tur kaminda.

Ora bo tabata lucha pa someté na Kristu i bin serka djE pa promé bes, Spiritu Santu tabata presente. Enfrentando e desánimo kousá dor di pruebanan di bida diario, E tabata einan. Ora e enemigu a bini manera un warwarú, E tabata einan pa hisa un bandera na bo fabor. Ora bo a purba bringa bo mes batayanan i a keda tur heridá i sangrando, pensando ku Dios no por pordoná bo, Spiritu Santu ta einan pa konfirmá na bo siguransa di e Tata su amor i Hesus Su abilidad pa salba te lo máksimo tur ku aserká Dios dor di djE. Spiritu Santu ta band'i bo. E ta bo amigu. E ta un persona real. I E ta konsolá nos. E meresé nos alabansa, nos amor, i nos gratitut segun nos ta aseptá Su amistad i kuido.





Persona di
Spiritu Santo



KUALIDATNAN DI:

- E ta nos Amigu eterno! (Romanonan 8:26).
- No ta un fantasma misterioso, E ta un Persona real. (Ev 616).
- E no ta un poder ku *nos por usa*, ta E ta usa nos, pa gloria di Dios.
- Ta Outor di bida spiritual (AA 284).
- Ta Mensahero Selestial (CT 370).
- Kristu ta aktua dor di Spiritu Santu (MYP 55; SD 282).
- Kristu ta kontinuamente ku Su pueblo dor di Spiritu Santu (SC 75).
- Kristu ta biba den hende dor di e Spiritu Santu (DA 388).
- Kristu ta duna poder di kurashon dor di Spiritu Santu (MH 224; CH 407).
- Kristu ta aksesibel na tur hende dor di Spiritu Santu (DA 669; ChS 255).
- Kristu ta mas serka di hende awor, ku ora e tabata visibel riba tera (DA 669).
- Kristu ta fortalese Su iglesia dor di Spiritu Santu (SD 13).
- Ta dirigí bataya pa Dios Su pueblo (DA 352).
- Ta kore kunÉ for di e kurason dor di impasiensia (2SM 236).
- Ta yena e alma ku deseo pa santidat (AA 52, 53).
- Papia kos pa loko ta kore ku Spiritu Santu (SD 316).
- Ta yuda nos den estudio di Dios Su Palabra (FE 433).
- Ta guia hende den tur bèrdat (1 SM 413; TM 476).
- Entristesé ora resistí konsenshi (5T 120).
- E hogar no por tin harmonia sin Spiritu Santu (AH 118).
- Hende no por arepentí a ménos ku Spiritu Santu traha riba e kurason (CT 365)
- Hende ku ta bebe profundamente di Spiritu Santu, no ta ambisioso pa nan mes (8T 140).
- Poder duna na hende dor di Spiritu Santu, pa vense piká (7BC 922).
- Maestra ku ta hasi orashon ta keda yuda dor di Spiritu Santu, den siña e hóbennan (COL 131-2).
- Ta paga su kandela ora hasi maluso kontinuo di talentonan (COL 131-2)
- Risibí den e kurason, pa medio di fe, ta komienso di bida eterno (DA 388).
- Spiritu Santu ta papia na e mente dor di Skrituranan (MB 6).
- Mester ta tur dia kontrolá dor di, Spiritu Santu òf Satanas lo kontrolá nos (5T 102; 2TT 150).
- Ta traha ku hende pa salbashon di almanan (FE 353)



**Fructum
di Spiritu**



¹ Frutanan di Spiritu ta, sinembargo, rasgonan di karakter, produktonan òf resultadonan di nase-di-nobo di un spiritu humano, rekrea den e imágen di Hesus, ku ta den kontrol. Un hende por bisa, “Wanta un ratu, esaki ta fruta di Spiritu Santu.” E kontesta ta: nò, e no ta. Laga mi hasi bo un pregunta, papiando den forma natural. Na unda fruta ta krese normalmente?

Fruta ta keda produsí na takinan. Di akuerdo ku Huan 15:5, Hesus a bisa, “Ami ta e mata di wendruif; boso ta e takinan...” Nos ta e takinan ku ta karga e fruta. Spiritu Santu *no* ta karga fruta. E fruta ta keda produsí den nos bida, for di e bida i naturalesa di Dios den nos dor di Spiritu Santu kual nos ta risibí na e nasementu di nobo. Hesus a bisa, “Ami ta e mata di wendruif,” asina e bida ku ta produsí e fruta ta bini for di djE, pero Spiritu Santu no ta esun ku ta karg’é. Ta suponé ku ta nos mester karga e fruta aki. E fruta aki mester kuminsá krese i madurá den nos bida i ta pa benefisio di otronan mira i partisipá di dje, segun nos ta permití e bida i naturalesa di Dios den nos kurason goberná i kontrolá nos bida.

Spiritu Santu ta miembro di e Deidat ku ta bin biba den nos na e nasementu di nobo. E ta trese huntu kunÉ e bida i naturalesa di Dios (di Hesus), ku ta nesesario pa produsí e fruta aki. Boutismo di Spiritu Santu mester mehorá e fruta di Spiritu ku ta produsí den bo bida, pero e no ta e fuente di komienso di dje, e nasementu di nobo ta esei. Ta imposibel pa e kosnan aki keda produsí den nos promé ku boutismo di e Spiritu.

Ripará tambe, algu ku ta hopi interesante. E palabra ta fruta i no frutanan, ounke nos ta papiando di mas ku ún kos. Mi ta kere ta asina pasobra e nuebe kosnan aki ta, en realidat, ún kos, ku ta e karakter òf naturalesa di Hesus mes. Nos mester mostra Hesus na e mundu dor di nos kondukta i karakter. E fruta aki no ta pa nos, e ta pa otronan. Naturalmente, mas bo permití e fruta di Spiritu produsí den bo bida, mas abo lo benefisiá i lo ta mas mihó pa bo. Pero e benefisio real lo ta pa otronan. Supuestamente nos ta palunan di hustisia, Isaias 61:3. Palunan ta produsí fruta. E fruta ei no ta pa e palu, e ta pa un otro hende.

Ora otro hende bini den kontakto ku bo, nan mester por partisipá di, òf a lo ménos mira i benefisiá for di e fruta produsí den bo bida. Otro hende lo mester por haña un apel grandi di amor

òf goso djis dor di ta rònt di bo. Ora pekadornan bini den kontakto ku bo, e fruta aki ku abo ta produsí, e karakter aki di Dios ku abo ta demostrá, lo yuda mostra nan na Hesus. Nan lo por mir’É, den bo, pa motibu di e fruta di bo spiritu.

Un otro kos hopi importante di e Spiritu ta ku, en realidat, e ta nèt kontrali di e obranan di karni. E obranan ei di e karni, òf produktonan di e naturalesa pekaminoso, ta resultadonan outomátiko den bida di kualke hende dirigí dor di e karni òf ku no ta salbá. E fruta di Spiritu na e otro banda, mester permitié keda produsí den bo bida segun bo ta someté na Dios. E fruta aki mester krese i madurá asina ku bo bida por kargé. E no ta outomátiko. E ta un eskoho, pa permití e bida i naturalesa di Dios yena henter bo bida di tal forma ku otronan lo por mira esaki den bo kondukta. Por ehèmpel, di akuerdo ku Romanonan 5:5... Dios a drama Su amor den nos kurason. E amor aki ta den bida di kada kristian for di e momentu di salbashon, pero e ta un eskoho di bo parti pa permití e amor ei goberná bo bida i kompartié ku otronan.

Den e lista ku ta sigui tin e fruta di Spiritu ku algun splikashon di kada un pa mas estudio.

1. Amor— kuida pa i buska e mihó bienestar di otro persona sin motibu òf ganashi personal. Romanonan 5:5; 1 Korintionan 13; Efesionan 5:2; Kolosensenan 3:14.

2. Goso— sintimentu di alegria basá riba e amor, grasia, bendishonnan, promesanan, i serkania di Dios ku ta pertenesé na esnan ku ta kere den Kristu. Salmonan 119:16; 2 Korintionan 6:10; 12:9; 1 Pedro 1:8.

3. Pas— trankilidad di e kurason i mente basá riba e konosementu ku tur kos ta bon entre e kreyente i su Tata selestial. Romanonan 15:33; Filipensenan 4:7; 1 Tesalonisensenan 5:23; Hebreonan 13:20.

4. Pasenshi— soportá, wanta; slo pa rabia òf desesperá. Efesionan 4:32; Kolosensenan 3:12; 1 Pedro 2:3.

5. Amabilidad— frena huntu ku fortaleza i kurashi; e ta indiká un persona ku por ta rabiá ora tin mester di rabia i humildemente somiso ora tin ku someté. Tito 2:25; 1 Pedro 3:15. Pa mansidumbre den Hesus kompará Mateo 11:29 ku Mateo 23 i Marko 3:5; Den Pablo, kompará 2 Korintionan 10:11 ku 10:4-6 i Galatanan 1:9; Den Moises, kompará Numbernan 12:3 ku Éksodo 32:19, 20.

6. Bondat— zelo pa bèrdat i hustisia i un odio pa maldat; e por keda ekspresá den aktonan di bondat (Lukas 7:37-50 òf skual i koregí maldat

(Mateo 21:12-12).

² ESKOHO


7. Fe— fieltat, lealtat firme i fiho na un persona na ken nos ta uní dor di promesa, kompromiso, konfiansa i honestidat. Mateo 23:23; Romanonan 3:3; Tito 6:12; 2 Timoteo 2:2; 4:7; Tito 2:10.

8. Humildat— kariñoso, no ke heridá niun hende of kousa nan doló. Efesionan 4:2; 2 Timoteo 3:10; Hebreonan 12:1.

9. Temperansia— dominio-propio, kontrolá bo deseonan i pashonnan, inkluyendo fieltat na bo promesa matrimonial; tambe puresa. 1 Korintionan 7:9; Tito 1:8; 2:5.

Nunka lo bo topa un lei ku ta prohibí biba di akuerdo ku e prinsipionan aki. Pablo a deklará ku no tabatin lei kontra kosnan asina. Lei ta eksistí pa restringí i den e fruta di Spiritu no tin nada pa frena. No tin prohibishon pa biba e estilo di bida aki. Kristiannan por i nan mester praktiká e birtutnan aki bes tras bes tras bes.

APLIKASHON PRÁKTIKO: Hasi un esfuerso konsiente pa eksaminá bo bida i bo kondukta i perkurá laga e bida di Dios sali for di bo spiritu pa asina bo por produsí e fruta aki pa tur hende por disfrutá di dje.



Ta ketu. Ta tempran mainta... Shelu ta pretu ainda. Mundu te ainda ta drumí. Dia ta na kaminda.

Denter di un momento dia lo yega. E lo basha bin den e pista ku salida di solo. Trankilidat di e ourora lo troka pa boroto di e dia. E pas di trankilidat lo keda remplasá pa e kana bai bin konstante di rasa humano. Refugio di tempran mainta lo keda invadí pa desishonnan ku mester hasi i kompromisonan ku mester kumpli kuné.

Pa e siguiente 12 oranan lo mi keda enfrentá na demandanan di e dia. Ta awor mi tin ku disidí i skohe. Pa motibu di Kalvario mi ta liber pa skohe. I asina mi ta skohe.

Mi ta skohe AMOR...

Ningun okashon ta hustifiká odio; niun inhustisia meresé amargura. Mi ta skohe amor. Awe lo mi stima Dios i loke Dios ta stima.

Mi ta skohe GOSO...

Lo mi invitá mi Dios pa ta e Dios di sirkunstansia. Lo mi rechasá e tentashon di bira negativo... ku ta hèrmènt di esun ku ta floho pa pensa. Mi ta nenga mira hende manera nada ménos ku sernan humano, kreá dor di Dios. Mi ta nenga di mira kualke problema komo nada ménos ku un oportunitat pa mira Dios.

Mi ta skohe PAS...

Lo mi biba manera hende pordoná. Lo mi pordoná pa asina mi por biba.

Mi ta skohe PASENSHI...

Lo mi no hasi kaso di inkombiniensianan di mundu. Na lugá di zundra esun ku tuma mi lugá, lo mi invit'é hasi asina. Na lugá di keha ku e tardansa ta muchu largu, lo mi gradisí Dios pa un momento ku mi por hasi orashon. Na lugá di sera moketa pa responsabilidadnan nobo ku ta duna mi, lo mi enfrentá nan ku goso i ku kurashi.

Mi ta skohe AMABILIDAT...

Lo mi ta kariñoso ku esnan pover, pasobra nan ta nan so. Kariñoso ku esnan riku, pasobra nan tin miedu. Kariñoso ku esun sin manera, pasobra ta asina Dios a trata ami.

Mi ta skohe BONDAT...

Mi ta keda sin un florin promé ku mi mishi ku un ku no ta di mi. Lo mi aseptá ku no ta tuma nota di mi promé ku mi broma. Lo mi konfesá

promé ku mi akusá. Mi ta skohe ser bondadoso.

Mi ta skohe FIELDAT...

Awe lo mi kumplí ku mi promesanan. Esnan ku mi debe lo no lamentá nan konfiansa. Mi asosiadonan lo no kuestioná mi palabra. Mi esposa lo no kuestioná mi amor. I mi yunan nunca lo tin miedu ku nan tata no ta bini kas.

Mi ta skohe HUMILDAT...

No ta gana nada ku forsa. Mi ta preferá ser manso. Si mi hisa stèm, laga e ta den alabansa so. Si mi sera moketa, mara e ta den orashon so. Si mi hasi un demanda, laga e ta di mi mes.

Mi ta skohe DOMINIO-PROPIO...

Mi ta un ser spiritual. Despues ku e kurpa aki ta morto, lo mi sosegá. Mi ta nenga laga loke ta bai putri, goberná loke ta eterno. Mi ta skohe dominio-propio. Lo mi ta yen di goso so. Apashoná solamente pa mi fe. Influensíá solamente dor di Dios. Siñá solamente dor di Kristu. Sí, mi ta skohe dominio-propio.

³ “E obranan di arte mas preferí no tin beyesa ku por kompará ku e bunitesa di karakter, kual ta fruta di Spiritu Santu su trabou den e alma.” —*The Ministry of Healing*, p. 37.

Si, ora bo topa ku problema òf aflikshon, anto bo goso troka bira gruñamentu i kehamentu, bo mester aseptá e goso di Hesus den bo kurason, dor di Spiritu Santu. KunÉ den bo bo por regosihá asta ora pruebanan fuerte bini. Mira 1 Pedro 4:12, 13.

Ora bo tin Kristu Su amor, pas, goso, bondat, humildat i dominio-propio den bo kurason, esaki ta identifiká bo ku Kristu i ta determiná si bo ta djis profesá di konosÉ òf si di bèrdat bo ta disfrutá di Su presensia den bo.

Di tur e grasianan Skritura ta menshoná amor promé. E kualidat spiritual aki ta resaltá riba tur e otronan. Mira 1 Korintionan 13:13... Esaki no ta e variedat barata di amor terenal asina popular den historia i kantika, pero ta esun selestial. Su enkanto, apnegashon, i kompashon, manera e ta deskribí den 1 Korintionan 13:1-7, ta revelá na nos ku tur e ocho otro birtutnan di Spiritu ta simplemente varios aspekto di amor den akshon.

Kada un kisas no ta keda manifestá den mésun grado, pero siguramente kada un lo ta presente den un bida yená ku Spiritu Santu.

Ni un rama no por karga fruta di Spiritu sin e union di rama-mata di wendruif ku Señor Hesus. E union aki semper ta revelá su mes dor di e fruta di Spiritu den e bida.

Manford George Gutzke ta kompará e fruta di Spiritu ku rayo di solo. “Tur e kolónan di regenbog ta presente den kada rayo di lus di solo. Nan tur t’ei na kualke momentu. Kisas no semper ta kapta nan, pero nan t’ei presente. No ta nesesario pensa di nan komo asina hopi koló separá. Meskos ku e kolónan di regenbog ta presente den lus, asina e rasgonan di kondukta personal ta den trabou di Spiritu Santu.”-The fruit of the Spirit, pp. 10, 11.



Tan pronto bo nase di e Spiritu, e birtutnan aki ta aparesé. I ora nos keda yená kada dia ku e Spiritu, nan ta sigui oumentá...

Dor di bo dos brasanan—fe i orashon— mishi ku Hesus mainta tras di mainta i risibí for di djE tur loke bo tin mester pa viktoria. Esaki ta sekretu di un eksperensia felis i viktorioso. Ta solamente segun bo ta risibí dia pa dia kantidat fresku di gracia, lo bo tin poder di akuerdo ku bo nesesidatnan diario i e abilidad pa usa e poder aki pa e gloria di Dios.”

¹ [Lessons from the fruit of the Spirit - Search \(bing.com\)](#)

² Max Lucado's [When God Whispers Your Name](#):

³ John L. Shuler, *Your Best Helper, the Holy Spirit*, pp. 55-60

í Proklamashon



dí e Evangelío

¹ “Karga fruta di e Spiritu ta nifiká tambe pa testifiká efektivamente pa bo Salbador. Echonan 1:8. Dios ta duna bo Spiritu Santu komo e úniko medio pa ekipá bo pa yena e lugá speshal ku El a asigná na bo den Su gran plan. “E rason pakiko Dios por hasi asina tiki pa nos ta ku nos ta lubidá ku birtut bibu den Spiritu Santu mester kombiná ku e agente humano.” —*Sons and Daughters of God*, p. 30.

Te kon leu Dios por usa bo? “Dios por usa kada persona djis den proporshon segun E por pone Su Spiritu den e hende su alma-tèmpel.”—*Testimonies*, vol. 7, p. 144. Dios a usa bo, E ta usando bo, i lo sigui usa bo. Te asina leu ku abo tin, ta, i lo permitiÉ pone Su Spiritu den bo. “No tin límite na utilidat di esun ku, pone su mes un banda, traha lugá pa Spiritu Santu traha riba su kurason, i biba un bida kompletamente konsagrá na Dios.”— *The Desire of Ages*, p. 250, 251.

E nuebe grasianan di karakter Kristian ta proveé e testimonio rekerí pa gana pa Kristu tur ku ke skapa e destrukshon di mundu. Ya ku Spiritu Santu semper ta transformá esnan ku E ta biba den dje, E ta pone un testimonio bibu den bo ku ningun hende inkredulo no por desmentí. Te kon leu bo transformashon lo ta ta dependé direktamente di e grado di bo entrega den fe na e trabou interior di Spiritu Santu. E fruta aki ku ta enserá biba un bida viktorioso ta proveé e yabi pa bo testifikashon efektivu. Poder ku ta salba lo pasa for di Señor Hesus na abo manera koriente for di un dynamo pa un artefakto eléktriko.

Ta abo so por determiná kuantu Kristu por hasi pa bo. “Manera bo a kere,” Hesus a bisa e senturion Romano, “Sosodé manera bo ta kere.” Mateo 8:13. E poder di Dios ta traha den bo i pa bo di akuerdo ku bo kontakto di fe ku Hesus. Bo fe ta e brùg ku ta konektá e bashí ku tin entre bo nesesidat i Kristu Su kantidat infinito di grasia i poder pa biba e bida Kristian.

Un tanki di awa haltu den serunan tin, ban bisa, un mion pia di awa. Manera tamaño di e akuedukto ku ta guia e awa for di e tanki pa e stat ayabou ta determiná e kantidat di líkido ku lo basha pa duna bida, asta asina tambe e midí di bo kontakto di fe ku Hesus lo determiná e kantidat di yudansa i poder ku bo lo risibí for di djE.

Ora bo risibí un buki òf un apelsina komo regalu for di bo amigu(a), abo simplemente ta konfia bo amigu(a) su sinseridat ora bo ta rèk man i tuma su regalu. Bo man ta representá bo fe ku ta risibí e regalu gratis di Dios Su salbasyon, hustisia, pas, deskanso, goso, viktoría, forsa, i tur otro kos ku bo tin mester. “Pa esun ku ta konfia nada no ta imposibel.” Marko 9:23. Fe ta e “man ku nos ta rèk kohe Kristu tene, i risibí Su méritonan.” —*The Desire of Ages*, p. 175.

Si abo ta gosa di tiki pas, goso, òf viktoría, bo man di fe simplemente no ta garando loke Kristu ta ofresiendo bo libremente.” Fe berdadero i orashon berdadero ta manera dos brasa dor di kua e ser humano ku ta suplikando ta tene duru na e poder di Amor Infinito.”—*Gospel Workers*, p. 259.

Ora bo rèk man pa medio di fe i orashon, kisas lo bo no mira òf sinti nada inmediatamente. Pero, si bo ta kere, lo bo mira.” Huan 11:40.

Karga fruta hasiendo tur klase di bon obra. (Kolosensenan 1:10), karga tur fruta di Spiritu den un bida ku ta testifiká di e Poder di Dios pa salba.



Si tur miembro di iglesia tabatin e boutismo diario di Spiritu Santu, falta di spiritualidat, tibiesa, warda Sabat den forma deskuidá, mundanalidat, i falta di poder spiritual lo a keda remediá.

Spiritu Santu yenando paden ta hasi posibel pa basha afó kontinuamente. Riba e dia di Pentekòste, na momentu ku e disipelnan a keda yená ku e Konsolador, bendishonnan a basha bin afó, ku a yena 3000 kurason ku tabata bashí.

Pero si no yena nos, nos tin nada balelapena spiritual pa kompartí ku niun hende. “Oro ni plata mi no tin,” Pedro a bisa na e pididó di limosna, “ma loke mi tin, mi ta duna bo.” Echonan 3:6. Por resumí e konsepto ei den e palabranan aki: Yena paden pa por tin pa basha afó.

“Nos por kompartí solamente loke nos a risibí for di Kristu; i nos por risibí solamente segun nos ta duna na otronan. Segun nos sigui duna, nos ta sigui risibí, i mas nos duna, mas nos lo risibí. *Asina konstantemente nos por kere, konfia, risibí i duna.*” — *The Desire of Ages*, p. 370. Énfasis suplí.

Den Efesionan 3:16-19, Pablo ta presentá un deskripshon maravioso di e bendishonnan ku ta bini ku e don di Spiritu. Fortalesé boso den profundidat di boso ser. Kristu ta biba den boso kurason pa medio di fe. Keda ankrá den amor i esei sea boso fundeshi. Ta kapas di komprondé na gran midí kon largu, hanchu, haltu i profundo e amor di Kristu ta. Ta yená ku e plenitut kompleto di Dios.

Alabá sea Dios pa e trabou parti paden di Su Spiritu pa nos viktoria i pa nos por ministrá efektivamente den nos testimonio na otronan.



¹ John L. Shuler, *Your Best Helper, the Holy Spirit*, p. 57- 60, 76



Bautismo

Spiritu

Santu

Huan Boutista tabata batisá ku awa esnan ku a paga tino na su yamada di arepentimentu. Asina tambe Señor Hesus a batisá ku Spiritu Santu esnan ku a risibiÉ komo nan Salbador personal i a indiká ku nan a risibiÉ dor di keda batisá dor di imershon. Pablo ta konfirmá e bèrdat aki. “a batisá pa asina nos bira parti di ún kurpa pa medio di mésun Spiritu.” 1 Korintionan 12:13.

Boutisá dor di Spiritu Santu ta enserá dos fase— e di dos fase ta suplementario i ta dependé riba esun promé. Promé ta bini e aspekto pa *inisiá*, ora bo ta keda regenerá dor di e Spiritu pa bira un persona nobo den Kristo. Na di dos lugá ta bini e aspekto di *kontinuashon* ora ku kada dia e Spiritu Santu poseé, kontrolá, i duna bo poder. E segundo aspekto aki, tin biaha referí na dje komo ser yen di e Spiritu, ta enserá pa keda batisá tur dia dor di e Spiritu Santu.

Desafortunadamente hopi ta faya di sigui ku e proseso di nase di nobo, di keda poseé, outorisá, i yena ku e Spiritu kada dia. Nan ta haña nan mes ta kai bèk bes tras bes den nan kustumbenan bieu pekaminoso, i nan ta puntra nan mes, ma ta di kon. Birando desanimá, nan ta haña ku a lo largo e nasementu di nobo ta stòp di tin nifikashon pa nan. Meskos ku e oyentenan-meimei di baranka den Hesus Su parábola konosí (Lukas 8:4-15), i ora e simianan a spreit, nan a seka pa falta di humedat.

Na solamente shete kaminda Beibel ta papia dirèkt di boutismo di Spiritu Santu. Sinku di e pasashinan aki ta referí na e boutismo aki komo un evento futuro, kuater di nan ta sita palabranan di Huan boutista. Mira Mateo 3:11; Marko 1:7, 8; Lukas 3:16; Huan 1:33. Esun di sinku Hesus a papia despues di Su resurekshon. Mira Echonan 1:4, 5. Di seis pasashi ta wak bèk na e eventonan i eksperensia di e Dia di Pentekòste. Echonan 11:15-17. Esun di shete (1 Korintionan 12:13) ta identifiká boutismo di Spiritu komo norma den e eksperensia di tur kreyente ku ta nase di nobo. Algun otro ekspreshon tambe den Echonan ta indiká boutismo di Spiritu i ta yuda splika e Spiritu Su ròl den kombershon.

E di shete okashon tabata ora ku e kreyentenan a risibí e boutismo di Spiritu i ta splika nifikashon di boutismo di Spiritu Santu. E ta kompará boutismo di Spiritu ku risibí Spiritu Santu na kombershon. Boutismo di Spiritu Santu no nesesariamente ta rekerí un segundo bendishon ku mester buska despues di kombershon, pasobra esei ta kuminsá ora e kreyente nase di e Spiritu. (Klaro, nos no ta referí na e boutismo *diario* di e Spiritu *despues* di kombershon).

Pedro a deklará ku tur ku risibí Kristu i boutismo lo risibí e Spiritu. Echonan 2:38, 39. Pero hopi

kreyente nasé di nobo ta faya di komprondé e siguransa aki. Nan ta lucha pa “haña e Spiritu,” i ta lubidá ku Kristu a primintí di duna nan Su Spiritu i ku e problema ta nan fayo di apropiá e regalo primintí. Ora nan a nase di e Spiritu na nan boutismo, nan a eksperensia un *komiensu* den boutismo di e Spiritu. Klaro, despues di e eksperensia aki nan komienso, nan mester sigui den someté kada dia i prevalesé den orashon pa por disfrutá di boutismo diario di e Spiritu.




Algun añanan pasá un barku, despues di un biaha largu, tabata aserkando boka di e Riu di Amazonas, ku ta manda awa fresku te leu pafó den e Atlántiko. Nan awa di bebe na bordo a kaba, asina e tripulante a manda un señal, “Manda yudansa, niun awa pa bebe.” Un barku ku tabata pasando a manda señal bèk, “Baha boso èmernan den e awa.” Nan tabata nabegá riba e kurpa grandísimo ei di awa fresku ku ta sali bin for di e riu poderoso i nan no tabata sa esei. Tur loko nan mester a hasi tabata di baha nan èmernan pa por haña tur e awa ku nan tin mester.

Hopi awe ta manda e señal, “Manda yudansa. Nos ke boutismo di Spiritu, pa nos por papia den lenga i eksperensia ékstasis di sintimentu.” Na nan ta bini e mensahe, “Ora ku bo a nase di Spiritu i a risibí e don di Spiritu pa biba den bo, bo tabatin un *komiensu* den ser batisá dor di e Spiritu. Hasi un entrega kompleto kada dia, ehersé bo fe, resa semper pa keda yená ku e Spiritu, i lo bo eksperensia su bendishon kompleto— no di akuerdo ku bo boluntat sino di akuerdo ku Su boluntat.”

Komo un persona ku a nase di nobo bo tin Spiritu Santu semper den bo te na bo kapasidat máksimo ku Dios a duna bo? Si no ta asina, pakiko no “laga bo èmernan abou” pa keda yená ku e awa spiritual ku ta duna bida? Hopi di esnan ku ta bisa ku nan ta Kristian ta djis kokochá mitar bibu spiritualmente, ku solamente un midí chikí di e Spiritu, ora ku nan por keda yená tur dia ku kantidat fresku di dJE.

Ya ku intensidat di boutismo di Spiritu ta dependé kon leu e hende ta yená ku e Spiritu, algun ku a risibí gran kantidat di e Spiritu na sierto tempu a malinterpretá nan euforia di ta tur loke nan tin mester di boutismo di Spiritu. E bèrdat ta ku esaki tabata solamente un oumento di midí di e Spiritu ku nan tabatin for di dia ku nan a nase di Spiritu. Komo Kristian ku a nase di nobo bo por spera momentunan di bendishon nivel haltu. Pero no mester malinterpretá nan. Bo ta keda batisá dor di e Spiritu ora bo nase di Spiritu— na *komiensu* di bo eksperensia ku e Spiritu. Mester sigui un bida kompleto di krese den gracia.

Un par di dianan despues di Pentekòste e apòstelnan a reuní pa resa pa kurashi pa prediká e evangelio bou di oposishon fuerte ku a lanta. “Ora nan a kaba di resa, e lugá kaminda nan tabata reuní a sakudí i Spiritu Santu a yena nan tur i nan a sigui proklamá Dios su palabra sin miedu.” (Echonán 4:31). Ripará ku mésun palabranan— “i Spiritu Santu a yena nan tur”— a usa pa referí na nan na Pentekòste, i ta apliká atrobe na nan.



Kompará Echonán 2:4. Esaki tabata di dos òf di tres boutismo di Spiritu pa nan? Nò. E tabata solamente un eksperensia mas intenso di keda yená kada dia ku e Spiritu despues di nan promé eksperensia kunÉ.

Por konsiderá varios ekspreshon di Tèstamènt Nobo komo sinónimo ku “ser batisá” dor di Spiritu Santu. Algun di esakinan ta “poseé” òf “kontrolá dor di” òf “yená ku” e Spiritu i “kana” òf “biba” den òf dor di e Spiritu. E union di taki-mata di wendruif ku Hesus ta deskribí tambe mésun eksperensia, manera risibí poder pa testifiká efektivamente, tin poder interior pa vense manera Kristu a vense, i keda yená ku poder for di ariba.

Señor a resumí pa nos, Su siguidónan, tur loke ta nifiká boutismo di Spiritu den e frase “boso den Mi i Ami den boso.” Huan 14:20. E kreyentenan por sa dor di eksaminá e fruta di nan eksperensia interior na lus di Dios su Palabra si nan a risibí poder di e Yudadó divino, sí òf nò.

“Ta sigurá nos ku nos por keda asina djaserka identifiká ku Kristu, e Yu di Dios, pa keda kompletamente ún kunÉ, manera E tabata ku e Tata. Ta ken por komprondé esaki? E palabranan aki ta pone un responsabilidat grandi riba nos. Nan ta e midí mas haltu di karakter, i ta kontené e *bendishon di mas riku* ku ta posibel pa kualke humano gosa di dje.” —*Special Testimonies to Ministers*, no. 11, 31. Énfasis suplí.

Bo tin gana di sa si bo a keda yená ku Spiritu Santu? Kua ta e señalnan? Míles di Kristian ku a nase di nobo no por mustra bèk na un tempu i lugá spesífiko ora ku nan a nase di e Spiritu. Pero e transformashon den nan bida for di maneranan mundano pa e kamindanan di Hesus ta para komo muestra sigur. Nan paresido na Hesus, Su siñansanan den nan forma di aktua, papia, kome, bebe, bisti, i adorá ta identifiká nan ku nan ta di Kristu. “Dor di nan fruta boso lo konosé nan.” Mateo 7:20.

“No bai dependé riba ningun sorto di sintimentu komo muestra ku bo a risibí boutismo di Spiritu Santu. Sintimentu ta gaña hende. Fe ta tene duru na e promesanan di Dios apesar di sintimentunan. “Asina nos tur, pa medio di fe, ta risibí Spiritu Santu ku Dios a primintí nos.” Galatanan 3:14.

Beibel ta referí na eksistensia di dos spiritu den mundu— e spiritu di obediensia (Echonán 5:32) i e spiritu di desobediensia (Efesionan 2:2). E spiritu di obediensia lo lucha pa armonisá ku e Palabra di Dios den tur kos— asta enkuanto e reglanan ku Pablo a pone den 1 Korintionan 14 pa papiamentu den lenga. Ta e spiritu di desobediensia ta hasi cherchè di e reglanan aki i ta enfatisá e don di papia den lenga indebidamente.

Batimentu di man, bula ariba-abou, trosementu físiko, goso yen di ekstasis, òf emoshon aplastante ta prueba di boutismo di Spiritu Santu? Nò. Beibel no ta mensioná ningun di esakinan komo evidensia di boutismo di Spiritu Santu.

Sinembargo, un bida kristian obediente, konsagrá bibá dia tras dia ta proveé evidensia inkontroversial di boutismo di e Spiritu. “Ora nos warda su [Kristu] Su mandamentunan nos ta permanesé den dje i E ta biba den nos,” e Palabra ta deklará.

“Esun ku obedesé Dios su mandamentunan ta keda den Dios i Dios ta keda den dje. Anto ku E ta keda den Dios, nos sa pasobra nos tin e Spiritu ku El a duna nos.” 1 Huan 3:24.

Bo akshonnan, palabranan, mirada, i aktitut lo demostrá presensia di Spiritu Santu den bo. Lo bo eksperensia un kapasidat mas grandi pa stima, segun e amor di Dios ta brota for di bo kurason. Wak Romanonan 5:5. I lo bo sinti e siguransa dushi i trankil ku bo ta un yu di Dios. Mira Romanonan 8:16. “I kaminda hustisia ta reina, ei pas, trankilidat i siguransa lo floresé pa semper.” Isaias 32:17.

Ellen White a skirbi, “Ora bo risibí e boutismo di Spiritu Santu, e ora ei lo bo komprondé mas di e gosonan di salbashon di loke bo a konosé henter bo bida te ku awor.” —Karta 33, 1890.

Pornada hende ta intentá deskribí kon Spiritu Santu lo traha. Sinembargo, manifestashon di e Spiritu lo no funshoná nunca den un forma kontrali na Beibel. Ta esensial pa risibí e boutismo na komienso na momento di kombershon. Pero e ta di mes tantu importansia pa mantené e boutismo diario di e Spiritu pa restu di bo bida.



BOUTISMO DIARIO

E boutismo di Spiritu Santu ta “Kristu bibando den bo,” òf “Dios Spiritu Santu trahando den bo.” Tabata asina ku Kristu. Su ehèmpel ta sigurá nos ku e por ta di nos tambe. Manera El a biba “dor di e Tata,” asina abo tambe por biba pa medio di djE. Mira Huan 6:57.

“Nos Salvador a dependé riba su Tata selestial pa sabiduria i fortaleza pa resistí i vense e tentador. Spiritu di su Tata selestial tabata animá i regulá su bida. E tabata sin piká. Birtut i puresa tabata karakterisá su bida.” —*Selected Messages*, bk, 3, p. 134.

“Ni dor di un pensamentu E [Kristu] no a entregá na tentashon. Asina e por ta ku nos. Kristu su humanidat tabata uní ku divinidat; El a keda prepará pa e konflikto dor di Spiritu Santu ku tabata biba den djE. I el a bini pa yuda nos tambe bira parti di e naturalesa divino.” —*The Desire of Ages*, p. 123.

Dor di ta yená kontinuamente ku Spiritu Santu, Kristu a mantené e relashon esensial ei— e Tata den dje i E den e Tata. Abo tambe por tin i mantené mésun relashon ku Kristu dor di ta den djE i permití E di ta den bo. — dor di ta batisá kada dia ku e Spiritu Santu.

Boutismo diario ta un eksperensia normal pa un kristian berdadero. Meskos ku a duna Kristu Spiritu Santu na abundansia (Huan 3:34), “asina lo dunÉ na kada siguidó di Kristu ora ku henter e kurason ta someté pa E biba den dje.” —*Thoughts From the Mount of Blessing*, p. 21.

A ménos bo tin poder spiritual proporshonal pa bo neseditatnan diario, bo no por biba un bida hustu. Bo bida lo faya di ta loke e mester ta òf por ta. Pero bo por tin poder proporshonal pa bo neseditatnan di kada dia dor di risibí un kantidat fresku di Spiritu Santu kada mainta. Dios ta hopi mas dispuesto pa duna Spiritu Santu na bo ku abo ta di pidiÉ. Un yu kombertí por tin e eksperensia aki di akuerdo ku su konosementu. Segun e ta baha tur dia den orashon, habri porta di su kurason pa Hesus drenta atrobe, kere ku Hesus ta drenta segun Su promesa, i risibí un kantidat fresku di yudansa, goso, pas, amor, i viktoria pa e dia, e, tambe, den su mes forma simpel, por disfrutá di e boutismo diario di e Spiritu.

Resa pa e Spiritu ¹

Bo por puntra, no ta algu kèns pa pensa ku bo a risibí algu, ora ku no ta asina? No! Bo tin ku kòrda ku ora bo ta atendé ku Dios enkuanto Su promesanan, loke por parse bobedat pa hende ta nètamente e forma kon Dios tin intenshon di kumpli den nos loke El a primintí den su palabra.



ILUSTRASHON:

Suponé bo kier bai na un ofisina ku ta keda na di dies piso di e edifisio. Ora bo kana drenta den e left, bo ta kere ku e lo hiba bo te na e di dies piso, no ta bèrdat? Si no ta asina, probablemente lo bo no a drenta mes den dje. Pero bo ta kere ku e lo hasi esei, asina bo ta drenta den dje ounke e no a yega einan ainda.

Asina tambe ta ku e promesanan di Dios. Nos mester kere ku nos a risibí nan ounke nos no a eksperensiá nan ainda.

UN OTRO ILUSTRASHON:

Laga nos bisa, por ehèmpel, ku henter bo kas tin waya pasá pa elektrisidat. Bo tin pera di lus den tur e kambenan. Bo resibu di koriente ta pagá. Pero a ménos bo hisa e suich, e elektrisidat ta keda den e wayanan i nunca ta yega na e peranan di lus.

Mésun kos ta bèrdat ora ta trata ser yená ku e Spiritu. Dios ke yena bo, pero abo tin ku hisa e suich dor di skohe pa someté, dor di orashon, dor di fe. E parti chikitu aki ta *abo* su responsabilidad.

Un hòmbler a pidi su pastor resa pa e por risibí Spiritu Santu. El a bisa, “Varios luna kaba mi ta purbando esaki, pero mi no a risibí nada.”

E pastor a sugerí pa nan resa i pidi kumplimentu di e promesa aki di keda yená ku e Spiritu.

Despues di orashon e hòmbler a remarká, “Mi no ta sinti ainda ku mi tin e.”

Su pastor a puntra, “Dios ta faya di kumpli ku Su promesanan?”

“Nò.”

“E ora ei E mester a yena bo ku su Spiritu ora bo a pidiÉ esaki di akuerdo ku su promesa.”

“Wèl, mi’n ta kere mi por pusta boka ku esei.”

E ora ei bo tin Spiritu Santu den bo awor aki mes. Spiritu Santu a drenta den bo bida na kontesta di bo orashon. Bo ta kere esaki?”

“Sí, mi ta kere”— i e tabata kier men e. Te ku e ora ei e por a deklará ku konvikshon ku e tabatin e testimonio interior di Dios su promesa. Tur loke e tabata falta tur e lunanan ei tabata di sa kon aktua riba Dios Su promesa ku fe bibu.

Abo tambe por sinti ku bo orashonnan pa keda yená ku e Spiritu no a wòrdu kontestá. Si ta asina, ehersé bo fe den Dios Su promesa sigur i gradisi Dios pa kumpli kuné den bo bida.

Segun bo hasi esaki lo bo tin un eksperensia yená ku e Spiritu.

Rekordá ku bo fe no ta den bo mes, pero den Dios Su promesa.

¹ John L. Shuler, *Your Best helper, the Holy Spirit*, pp. 88, 89

E píká ku
no tín Þordon



Ningun hende por spera Spiritu Santu ta bai keda biba den dje si e ta hòrta, keda sin duna diesmo i ofrenda, ta gaña, ta kometé adulterio, òf ta kibra e dia santu di Sabat. Dios ta rekerí pa bandoná piká komo kondishon di risibí e Spiritu. Bo por pidi pa e Spiritu, pero si bo “a warda maldat” den bo kurason, “Señor lo no a tende bo.” Salmo 66:18. (BS)

Si bo a haña bo mes ta pensa pensamentunan malu, bo tin ku determiná ku Dios Su yudansa pa yena bo mente ku e kosnan ku ta honr’É. Si bo a maltratá un hende, bo mester pidi e persona ei pordon i tambe Dios Su pordon, anto determiná di trata e persona ei den un forma kariñoso. Si bo manera di papia, aktua, kome, bebe, bisti, ètsetera, no ta konforme e instrukshonnan duna den Beibel, bo mester, pa grasia di Dios hasi e kambionan nesario pa trese bo forma di ser bou di kontrol di Su Spiritu. Si ora bo ta resando pa keda yená ku Spiritu Santu bo konsenshi molestiá bo den kualke kos partikular, drecha e asunto ku Dios promé ku bo sigui ku bo petishon.

Konfesá i renunsiá e piká, pasobra “es ku rekonosé nan i evitá nan, ta haña pordon.” Proverbionan 28:13.

Hasi Spiritu Santu tristu

Un di e strobashonnan ménos sospechá pa keda yená ku e Spiritu ta di hasiÉ tristu. Ta pa e motibu aki ku e apòstel ta spièrta, “Anto no hasi Spiritu Santu di Dios ferdrit; Dios a seya boso kunÉ komo su propiedat pa marka boso pa e dia di salbashon final.” Efesionan 4:30. Ripará ku Pablo ta hasi e spièrtamentu aki no na paganonan, pero na Kristiannan ku a nase di nobo. Ta kon kristiannan —hende ku a nase di nobo— por hasi Spiritu Santu ferdrit? Nan por hasi esaki dor di nenga di skucha na e “brisa suave.” 1 Reinan 19:12.

E Spiritu por trese na nos atenshon, por ehèmpel, ku ta tolerá entretenimentunan indeseñte-- (wak *Counsels to Teachers*, p. 348, 349), matrimonio ku inkredulo (wak *Testimonies*, vol. 5, pp. 364, 365), ta deskuidá den wardamentu di Sabat (wak *Testimonies*, vol. 4, p. 248), tin miedu i aflikshon inapropiá (wak *Gospel Workers*, p. 261), ta faya di kontrolá imaginashon (wak *Testimonies*, vol. 5, p. 310, 311), kudishi (wak *The Acts of the Apostles*, pp. 72, 75, 76), duda Dios Su amor i deskonfiá Su promesanan (wak *Steps to Christ*, p. 118), ta gratifiká egoismo (wak *Testimonies*, vol. 4, p. 221), represalia (wak *Christ’s Object Lessons*, p. 171, 172), ta hasi komentonan amargamente severo (wak *Counsels on Stewardship*, p. 115), òf ta partisipá den kritika destruktivo (wak *The Desire of Ages*, p. 323).

Un nengamentu persistente bou di konvikshon di Spiritu Santu pa bandoná kualke piká por hasiÉ ferdit i ta kore kunÉ.

Tuma e lista aki di kosnan ku ta hasi Spiritu Santu tristu i bai bo so ku nan serka Dios. Pasa riba kada un i puntra, Esaki ta apliká na mi? Despues ku bo a konsiderá kada punto ku orashon, resa asin’aki: “Señor, pordoná mi den loke mi tabata hasi Spiritu Santu tristu. Yuda mi for di awor padilanti pa no hasiÉ mas, pero mas bien prepará mi pa keda yená mas kompletamente pasobra mester di djE den e último dianan aki.”

“Ora ku “ami” no t’ei mas den un persona, ora ku kada dios falsu a wòrdu saká for di e alma, e bashí ta keda yená kompletamente ku e Spiritu di Kristu.”—*Gospel Workers*, p. 287. Énfasis suplí.

Kiko ta pasa ora bo habri tapa di un bòter di kuminda paketá ku vaküm? Bo ta tende un zonido segun airu ta bin unbes paden pa yena e vaküm. Si no tabatin vaküm, e airu no por drenta. Asina tambe, a ménos nos keda bashí sin e ami den nos, ningun vaküm ta keda formá, ku e Spiritu por yena.


Poko ta keda yená kompleto ku e Spiritu ora nan resa, pasobra e espasio ku E kier okupá ta yen di gran ‘AMI’.

Un glas di ocho òns mitar yen ku awa no por risibí ocho òns yen yen di djus di apelsina. Di e forma ei Hesus a enfatisá ku mester renunsiá nos mes i tur dia krusifiká e ami komo promé rekisito pa kualifiká nos komo un di Su berdadero siguidónan. Wak Mateo 16:24; Lukas 9:23.

Spiritu Santu tabata yena Pablo tur dia, pasobra e tabata krusifiká su mes tur dia. Mira Galatanan 2:20. Ripará: “su boluntat i su deseo tabata kada dia den konflikto ku deber i e boluntat di Dios.”—*The Ministry of Healing*, pp. 452, 453. Pablo tabatin mésun problema ku nos tin. E mester a hasi desishonnan pa Dios i kontra di su mes. Su mes “ami” mester a muri. “Na lugá di sigui tras di inklinashon, e tabata hasi Dios Su boluntat, ounke kon duru esaki tabata pa krusifiká su mes naturalesa.”—*Idem*.

No ta fásil pa krusifiká bo mes tur dia. “Ta e krus ta krusa pasa dor di e afektonan natural i e boluntat.”—*Testimonies*, vol. 2, p. 651. Pa e motibu aki e Spiritu ta yena asina poko.

KRUSIFIKÁ KU KRISTU



**BIBA PA MI
MES**

DERÁ KU KRISTU

**RESUSITÁ KOMO
HENDE NOBO
DEN KRISTU**

Ningun hende por hasi su mes bashí di e “ami”, meskos ku no por kohe un èmer i karga skuridat bai kuné sak’é for di un kamber skur. Pero e hende por sende e suich elèktriko i kore ku skuridat. I skuridat ta keda afó tanten ku e lus ta sendí. *“Ningun hende por hasi su mes bashí di su mes. Nos por solamente konsentí pa Kristu hasi e trabou. E ora ei languahe di e alma lo ta, Señor, tuma mi kurason; pasobra mi no por duna Bo e. E ta bo propiedat. Mantené puru, pasobra mi no por kuid’é pa Bo. Salba mi for di mi mes, suak, ku no parse Bo. Moldia mi, forma mi, hisa mi den un atmósfera puru i santu, kaminda e koriente riku di Bo amor por brota pasa dor di mi alma.”* —*Christ’s Object Lessons*, p. 159. Énfasis suplí.

Dios semper ta kontestá e orashon aki. Asta e ta manda su Spiritu pa yuda renunsiá bo mes pa E por yena bo kompleto manera bo tin mester. Kada mainta konsagrá bo boluntat na djE. Bo mes lo goberná? Òf e Spiritu lo goberná den bo?

“Ora nos ta kompletamente konsagrá, di henter nos kurason na e sirbishi di Kristu, Dios lo rekonosé e echo ei dor di drama su Spiritu sin midí riba nos.” —*Evangelism*, p. 699.

Generalmente por kategorisá Kristiannan profeso di akuerdo ku kuater nivel di dedikashon ku ta asendente:

(1) Tin algun ku nunca a nase berdaderamente di nobo. Nan eksperensia ta “tur di mi mes i nada di Kristu.” Nan no a risibí Spiritu Santu.

- (2) Algun ku a nase di nobo, a avansá na “Un poko di mi i un poko di Kristu.” Nan tin sierto midí di e Spiritu, pero nan no ta dje yen ei manera Kristu ke pa nan ta.
- (3) Algun a renunsiá nan mes te ora ku nan tin “ménos di mi i mas di Kristu.” Nan ta serka di keda kompletamente yená.
- (4) I algun a krusifiká nan mes asina tantu ku nan tin “nada di nan mes, i tur ta di Kristu.” Nan ta eksperensia plenitut di e Spiritu te kaminda nan kapasidat por karga esaki.

Mi amiga, na ki nivel bo ta pará?

Bo por sigurá di keda yená konstantemente dor di bini mainta tras di mainta serka Hesus pa bebe di su awa bibu. Bo ta keda bini asina hopi biaha serka Hesus ku ya bo no tin set atrobe.

Bo ta keda wòrdu yená tanten ku bo ta sigui bebe. Na esnan ku hasi esaki ta kumpli e promesa: “Ku legria boso lo saka awa for di fuentenan di bida.” (BK); “Pesei, ku goso boso lo saka awa for di fuentenan di salbashon” (BS). Isaias 12:3.

Den Su sermon riba e Seru Hesus a bisa: “Felis esnan ku hamber i set pa hustisia, Dios lo satisfasé nan.” Mateo 5:6.

Nos ta risibí hustisia solamente dor di Spiritu Santu ku ta kompartí esaki ku nos.

ViKTORIA riba insultonan i fastidio ta muestra ku Spiritu Santu ta biba den bo kurason. “Si soportá dañonan i insultonan ku mansidumbre, si respondé suave na palabranan di insulto, i mustra bondat pa aktonan opresivo, esaki ta indikashon ku e Spiritu di Kristu ta biba den e kurason, ku sap di e Mata di wendruif bibu ta pasando bai pa e takinan.”—*Testimonies*, vol. 5, p. 344.

Kome di e palabra di Dios i tin e boutismo di Spiritu diariamente ta bai huntu. E persona ku ta yen di e Spiritu ta studia Dios Su Palabra i ta komé. Mira Yeremias 15:16. E ta balorá e Palabra muchu mas ku su kuminda nesario. Mira Job 23:12.

Pa ta yen di e Spiritu ta nifiká pa kultivá e spiritu i kustumber di orashon. “Esnan ku no ta kultivá e spiritu i hábito di orashon no por spera di risibí e zeta di oro di bondat, pasenshi, mansidumbre i amor.”—*Testimonies to Ministers*, p. 511.

Pa ta yená, anto, ku e Spiritu, abo mester ta dispuesto pa arepentí, pa trese un boluntad sometí na Dios, un kurpa dispuesto pa obedesé, un kurason ku a saka ami pone afó, ku tin un hamber i set pa e Spiritu, i tin fe den e promesanan di Dios.

E Piká Ku No Tin Pordon (5 T 634)

“Kiko ta enserá e piká kontra Spiritu Santu? Ta pa boluntariamente atribuí na Satanas e trabou di Spiritu Santu. Por ehèmpel, ban bisa ku un hende ta testigu di e trabou speshal di Dios Su Spiritu. E tin evidensia konvinsente ku e trabou ei ta den harmonia ku Skrituranan, i e Spiritu ta testifiká na su spiritu ku esaki ta di Dios. Despues, sin embargo, e ta kai bou di tentashon; orguyo, suficiensia-propio, òf otro rasgu malu ta kontrol’é; i rechasando tur evidensia di su karakter divino, e ta deklará ku loke el a rekonosé promé di ta poder di Spiritu Santu tabata e poder di Satanas.

Ta pa medio di Su Spiritu Dios ta traha riba e kurason humano; i ora hende boluntariamente rechasá e Spiritu i deklará ku e ta for di Satanas, nan ta kòrta sera e kanal dor di kua Dios por a komuniká ku nan.

Dor di nenga e evidensia ku a agradá Dios duna nan, nan ta kore ku e lus ku tabata bria den nan kurason, i komo resultado nan ta keda den skuridat.

(*Comprehensive Index to the Writings of E.G. White*, p. 2560)
[Piká inpordonabel kometé kontra Spiritu Santu dor di:](#)

- Diabelnan (4BC 1163; EW 146)
- Felix (AA 427)
- Herodes Antipas (DA 731)
- Israelitanan idólatra (PP 3260)
- Jerusalem den rechasá Kristu (DA 587)
- Pueblo Hudiu den rechasá Kristu (DA 324)
- Saserdotenan i gobernante Hudiu (TM 73)
- Hudas Iscariot (DA 654-5)
- Rei Saul (2BC 1023; PP 635, 676; 4SG-a 85)
- Korah i kompañeronan (PP 405)



- Nero (AA 496-7)
- Pueblo di Nazarèt (DA 241)
- Farao (PP 268-9)
- Fariseonan (5BC 1092)
- Sanhedrin (DA 241)
- Satanas (SR 26-7)
- Algun Atventista Milerita (GC 432)
- Yunan di Eli (2BC 1010; PP 5890)

Pa un tempu hendenan ku a hasi e piká aki por parse di ta yunan di Dios; pero ora sirkunstansianan bini pa desaroyá karakter i mustra ki tipo di spiritu ta den nan, lo keda kla ku nan ta na banda di e enemigu, pará bou di su bandera pretu.” — *Testimonies*, vol. 5, p. 634.

“E rabia di Dios no ta deklará kontra pekadornan ku no arepentí djis pa motibu di e pikánan ku nan a hasi, pero pasobra, ora a yama nan na arepentimentu, nan a skohe pa sigui resistí, ripitiendo pikánan di pasado, desafiando e lus ku a duna na nan. Si e lidernan Hudiu a someté na e poder konvinsente di Spiritu Santu, nan lo a wòrdu pordoná; pero nan tabata determiná pa no entregá. Den méson forma, e pekadornan, dor di sigui resistí, e ta pone su mes kaminda Spiritu Santu no por influensió.” — *The Acts of the Apostles*, p. 62.

